

四庫全書

集部

欽定四庫全書

五百家播芳大全文粹卷七十四

宋 魏齊賢

葉 棻同輯

青詞

祈嗣

祈嗣設醮青詞

楊祐甫

大道善應無方體之可求人欲必從有情性而不忒敢

傾微悃上瀆高聽伏念臣竅繁童心頗蒙駕質雖肖翹
於一氣譬蠕動之何知少也不祥早神傷於陟岵長而
無賴徒情恃於凱風以小善無益而莫為故定命靡諶
而弗祐綵衣以養寧慰於母心篋簞空陳未遑於熊夢
輒憑清侶仰叩員真庶通葵嚮之誠陰錫椒蕃之福伏
望大鈞廣運洪造曲成肇舉添丁異共勤於農畝常樂
有子永均賴於國風

催生保安設醮青詞

劉忠肅

大道無形莫求於聲臭至仁愛物善應於洪纖輒歎靈
壇瀝陳丹悃伏念臣本非元識幸齒最靈鷄彼林鷦願
安於常分愚如芻狗但樂於至仁今臣之妻方身於此
考夢祥之戒兆念寶典之有祈序協嘉平迎厥誕彌之
月朔維乙亥又其本命之辰并此吉時恭陳清醮潔誠
齋戒祇事夙宵瞻顙圓而若臨岐景緯之在望伏冀上
真孚佑列聖儲休拂其災害之虞錫以康寧之福虔其
寶鑑仰瀆高靈

誕免禳謝設醮青詞

圓穹垂祐非求報於有生庶類蒙休合知歸於洪造輒
輸愚悃仰瀆高靈昨者以臣妻任氏夢祥屆期乳產叶
吉起居向背寧無奸於陰陽食飲節宣固有蠲於拘忌
而既生育而無疾災由列聖大孚以仁使一物皆得其
所輒齋戒於靖館伸報謝於洪私凡在生成雖無物足
以稱德苟能齋戒雖惡人可以事天更冀錫以壽康為
之終始

生子賽願設醮青詞

洪造無私仰荷生成之賜微誠曷報少伸感幸之悰伏
念臣向因彌月之辰嘗露願天之請丹表上達善願俯
從居然就蓐之生坐獲懸弧之吉悉蒙恩祐敢負初心
虔修清淨之科進瀆高明之聽伏願上穹降鑒列聖垂
休從茲襁褓之男日增長茂更畀閨門之集時遂康寧
誕免賽謝設醮青詞

大德曰生已協熊羆之夢至誠無息敢傾螻蟻之心比

臨蓐以懷憂輒欲望雲而請命亟賴乾坤之孚佑肆令
母子之驩康爰按真科用酬丕貺以似以續幸家世之
有傳難終難窮庶年齡之未艾

禱病謝安

為父禳災設醮青詞

王望之

愛敬盡於事親敢忘喜懼齋戒可以事帝惟務感通輒
欽翼翼之誠仰瀆高高之聽伏念臣某高年耄矣衰髮
皤然少違攝養之方稍至虛羸之疾胃弱倦於飲食疥

痒疲於抑搔敢應元命之辰恭設上穹之供仰祈真聖
俯鑒丹心病勿藥而遂瘳壽如山而益固誓崇至道永
答諸恩

為母保安設醮青詞

赫赫在上無聲臭之能通款款之愚有精誠而可格敢
冒雷霆之譴冀申駒犢之情伏念臣久冥周行上依洪
造一門受祿恩逮旄倪六歲守邊效無毫髮幸啟居之
良便獲溫清之不違屬當拏歛之初間多耄艾之感用

深沐惕懼失和平敢涓時日之良具致黃汗之薦祓除
舊悔召致吉祥伏願上帝博臨衆真昭格錫以康娛之
應蠲其約結之勞天地至仁豈棄捐於螻螻母子為善
當傳付於子孫

為母禳災設醮青詞

欲壽其親實人心之至願無私於物仰天監之弗違畢
竭精誠懇祈孚佑伏念臣母封邑某氏嘗嬰疾疹備極
憂虞雖諧藥石之功尚有夙宵之惧蓋慮曩愆未弭陰

罰猶深恭啟
淨筵仰干洪造
願賜康寧之福
偕登耆耄之年
均逮家庭
悉仰壽祉

為母禱病設醮青詞

林豈塵

天道難諶
莫測高明之妙
母氏聖善
或庸疾痛之呻
輒露丹衷
仰干洪造
伏念臣少孤
多蹇偏恃焉
依僅忝一官
之微方詣三
釜之養而母
妾張氏比緣
往臘偶跌殘
軀迨今延七
八月之間而
脉有五六至
之數往來寒
熱喘急浮虛
雖藥石以交
攻矧桑榆之
已暮念下堂
而傷

足行或使之惟反本以呼天勢莫急此適值旁於本命
用嚴按於真科伏願何禍不消勿藥有喜百拜手以為
壽固人子之至情一跬步而不敢忘仰真功之密護

為母禱病設醮青詞

犬馬有養乃往聖之格言螻蟻輸誠賴皇天之昭鑒輒
伸危懇仰瀆蓋高伏念臣母永壽縣太君王氏克配先
臣肇興衰緒衣被三百指勤勞六十年有造家之大功
無持身之小失偶嬰疾疹久歷歲時浸至疴羸實深憂

惧此蓋子孫稔惡門戶匪昌降殃乃及於老親誅罰不加於小已是用籲天引咎伏地祈哀載潔清壇恭延開士伏願上真垂祐列聖降衷察慈母之生平感孤臣之末路沉疴頓去亟收勿藥之功盡室何為惟結省愆之誓

為夫禱病設醮青詞

宣化承流或蹈陰陽之患赦過宥罪願回天地之心若時良人充職下邑欲更新於百弊宜積怨於一身西館

經營冒方隅而罔測東垣版築臨歲序以奚逃加之五
命九星偶此三刑六厄接春夏而猶梗衝已亥以仍災
藥石滿前曾莫施於人力雲霓在望當曲借於神威會
習是而知非庶轉禍而為福一洗腹心之苦肆令膚草
之充既安既寧永壽期於千載有慵有性仰道蔭於九
霄

為男禱病生日設醮青詞

作善而降之祥事固闕於天道不誠而未有動理亦繫

於人心輒瀝丹衷仰干洪覆伏念臣男具官某年方羈
貫寵冒簪裳近拙衛生旋致陰陽之爽未痊勿藥實深
父子之情是用皈命絳霄投誠黃宅恪取誕生之旦躬
陳醺謝之儀遵琅函瓊笈之科覲風馬雲車之會虔期
降鑒早迪吉康壽綿三素之雲氣暢七蕤之籥俯殫精
意固備寫於翹勤仰瀆圓清願默垂於孚佑

為女禱病設醺青詞

天地之德常均覆載之仁父母之心不勝駒犢之愛敢

瀝殫於懇悃以冒瀆於蒼穹臣資乏進修積多憂患歷
年於此疾幾徧於一門涉春以來病復侵於長女悵藥
石之弗效惧膏肓之已深與其委命於巫醫不若求哀
於仙聖肆式羽衣之典冀延風馭之臨伏願上帝垂恩
諸真降鑒念其稚齒素勤孝弟之修愍此沉疴賜以痊
安之應當共期於頂踵庶仰謝於生成

為女禱病設醮青詞

穹然上儀蠢爾大類天人之際固遠而莫交影響所通

有誠而可格祇伏清場之次虔敷丹款之辭伏念臣稟
此微生陶乎大化冒國恩於中外由帝力之生成而臣
之第二女趙氏婦佺爰自舊年偶嬰內疾陰陽之升降
或失其序脾肺之逆順不相違和氣液轆乎中形色變
乎外乍退而復進謂有而若無殆及歲期未收藥喜意
其運歷之有會選或者星宮之所加臨空復惧心莫能
致力夫惟物一失所則造化以為病人有不得則呼號
以及天謹稽式於科文用歸誠於禳謝伏願上真孚德

列聖協仁被其无妄之災錫其降康之祐庶獲安於常序仰無累於大鈞

禱病東嶽設醮青詞

表儀四鎮孰尊喬嶽之靈臨長百神爰有天孫之貴廓洪慈而溥施應精禱以咸孚伏念某頃自初秋寢嬰微疾恐尤違之斯積致譴責之攸加盛厯數之將衰慮年齡之不永省躬自刻敢少怠於忱恂降福維新實仰憑於陰隲是用祓除庭宇尊按科儀延飈馭於紫清罄悃

誠於丹素伏願真靈孚佑慈寶鑒臨崇降嘉祥滌除灾
癘誓竭精純之守仰酬洪覆之恩

禱病保安青詞

人大患為有身豈免井毗之寇天蓋高敢不跼用靳乎
佑之仁輒羞蕙蒸蘭藉之儀式延風馬雲車之馭望九
閭而稽首罄十念以陳詞伏念臣早服微官晚叨內職
七年去國敢妄意於功名五月養疴猶未蠲於藥石今
則患纏右足脉滯三經雖不爽於良行然猶愆於逸步

或謂風淫未解或云氣瀦弗宣嬰病者日異於十全理疾者猶持於兩可是用輒攄丹懇仰叩高真伏祈覆載之慈特畀康寧之福齋戒以事帝既殫精意之誠忱痛疾則呼天蓋出人情之迫切

禱病設醮青詞

昊穹杳邈無遠不周螻蟻微賤在誠可格仰叩昭昭之鑒俯陳款款之餘伏念臣起自孤寒擢居侍從冒寵靈之已過輸績効以無聞雖夙寤宵興期臻利益然任重

道遠惧積愆尤而況護絕塞者五六年統屬城者十一
郡政刑寬猛倘或失中罔固重輕未能無誤茲獲神明
之譴用招疾疢之侵雖曲荷於哀憐已頓詣於痊愈尚
餘纖末未復故常敢稽首而叩閤誓洗心而改過伏願
上真旁燭諸聖溥臨大回日月之光深愍駒犢之病赦
其罪戾賜以夷瘳溝壑未填倘尚依於覆載頂踵何忌
願少謝於生成

禱病設醮青詞

應天以實敢陳文過之辭小智自私輒露貪生之請仰
惟乾坤之大造俯鑒螻蟻之微誠伏念某生而顛愚幼
多罪戾驕奢自恣猖狂妄行爰自無始以來養成莫大
之患皆緣貪嗔癡之宿習造為殺淫盜而不知罪釁所
鍾疾疢斯累喘滿害於飲食支離幾廢起居恐遂沉綿
莫知圖救捫心自省難追既往之愆嚙指啣哀覲許自
新之路輒憑道侶恭演真科精意默通高真垂佑願賜
再生之澤早臻勿藥之期誓畢此生歸依大道

禱病設醮青詞

禍淫福善於昭天監之明視履考祥莫非已求之自取
殫誠赤上達圓清伏念臣樸學罔庸頽齡侵逼昨日留
都而瀝請獲歸故里以養安荷君上之大恩未知稱塞
取朝廷之公器已極叨逾由盈溢之生灾果陰陽之致
寇食衰恃粥曾何尚飯之能足不良行且有既微之腫
望扶持安全之賜歸包含偏覆之仁是用董被恍衷歸
投洪造伏望三清昭格列聖溥臨臨虧除愆尤敷錫祉福

疾造有喜庶幾勿藥以遂瘳老無能為更冀及年而得謝

禱病設醮青詞

三年於此愧無補於承流百堵皆興念有心於草故偶當二黑七赤之次重詒五臟六腑之憂餐洩兼旬寒漱達旦氣獨升而不降萬苦嗔胃疾已却而復來衆醫拱手廼決疑於象數亟歸命於穹蒼蓋去弊必欲從權既往不咎誤心初非為已雖悔可追肆嚴禳禱之科一救

繕營之失方習是知非而有請宜赦過宥罪以無私神之格思庶共安於冥漠天其或者將遂畀以壽康誓犬馬之餘生圖報乾坤之大賜

禱病設醮青詞

疾痛呼天本凡人之常態齋戒事帝實先民之格言既可微詞敢忘重謝伏念臣先乘一障近控二邊多以鬼稱殆非人境暴風發屋毒霧障山有三百指性命之憂無二千石仕宦之樂陰祈拯護默賜感通灾疾既平終

更以理冲科恭閱寶席夙薰尚欲微恩未知報德伏願
大神昭鑒衆宰溥臨佑此週年敷之美福當益持於晚
節用少荅於殊休

謝安設醮青詞

天道助順方丕佐於私門人情喜安敢獨忘於隆施靜
惟一介久去四明庭闈時奉於好音閨壺日從於燕處
誕均百福旁暨羣兒雖大化密庸曾莫知其所謝而至
誠能動或可藉以為辭恭對蘭場恪羞蘋薦庶竭歸依

之力用酬覆燾之恩室家臻臻已無憂於旦暮吉祥止
止當不變於初終

謝安設醮青詞

苟有明信雖微物足以薦神惟能潔誠故惡人可與事
帝幽顯之際影響昭然道固無私理則有感凡具生知
之類咸資覆育之恩蓋如父祖之用心均欲子孫之得
所借陳危懇仰叩至真願憐迫切之愚衷曲賜聰明之
鑒照伏念臣稟生陋劣受性顓蒙道不可違而豈能無

違道之愆情不可任而間亦有任情之失詩書夙好居
雖勵於修為覆轡照臨恐未逃乎愧怍往歲辛卯泮檄
彭門偶調護之失宜致寒熱之交戰醫師措手藥物呈
能坐集百憂尚稽小愈乃呼天而請命繼決臆以陳辭
夫何溥博之洪鈞不忍細微之告病高其母而下其耳
遽沐降康甘其食而安其居適臻勿藥靜念神明之所
畀豈容僥倖以及斯得逭死亡唯知感戴欲具蘋蘩之
禮適丁苦塊之艱本惧觸於尊威致未伸於薦獻即此

惕易重成罪尤苟察其中之無他猶冀上天之必赦今
者恭按科儀嚴列供張庶効涓塵之報式殫犬馬之誠
茗椀薰爐在凡情而無怠雲車風馬希帝澤以來臨於
忙忙恍惚之間望欣欣樂康之應咎潜埽蕩災絕侵陵
生存獲壽命之長死歿投幽陰之苦凡此私禱深瀆高
穹

謝安設醮青詞

黃泰之

承流宣化敢忘撫字之勤耗慮疲精是致節宣之夾密

祈陰隲用迪吉康稽顙知歸瀝表有請伏念臣蒲柳易
衰之質樗櫟無用之材茲小試以臨民實見憐於造物
憂慮悔吝未免閑愁之入心扶持安全果使沉痾之去
體甫臨書考復忝召恩謾輸螻蛄之再三未報鴻私之
萬一輒憑青醮用薦微誠仰冀高真俯垂昭鑒爰自復
陽之始益開泰道之亨居厭海邊幸脫跡瘴雨蠻烟之
外恩隆天上遂託身春風和氣之中

謝保安設醮青詞

監觀四方天蓋垂於顯道齊明盛服人必効於敬心臣
冒寵清時得聞暮景滿盈是戒敢忘止足之恩疾疢易
生每幸康寧之保皆化工之攸芘豈綿力之可酬適屆
初春虔修羞供伏願上元校錄均庶彙以承休投老年
齡與闔門而無恙

禳時災

禳火災設醮青詞

謫居高安行將再歲杜門自省日懼禍災乃者火焚閭

間勢極熾猛風從北來正趨館舍治任挈族未知所適而風回火轉幸免焚蕪向非神祇鑒察憐憫困窮則雖免灰燼之虞必有狼狽之患敢陳菲供少荅靈聰伏願洗滌宿殃稍垂慶祐

禳星變設醮青詞

惟天佑聖昭垂儆戒之文聖惟畏天克盡嚴恭之實爰修庶政祇飭清躬固已式叶於帝心方且仰回於星馭乃欽明命載款殊庭嚴寶籙之上儀倭飈靈之不鑒叶

成休氣數暢皇家外暨多方咸浸厚祿

禳水災設醮青詞

靜專動直示禍福以無私陰慘陽舒幹災祥於莫測輒
罄修禳禱祠之禮用回生植長養之心乃眷淮壖猥當
江澍適屆九秋之候遂傷三日之霖一月不息平時閤
闔半為魚鱉之淵樂歲田疇盡作舟航之地方巢居而
茹歎宜蘋薦以祈哀謹叩丹霄恭投血懇既動紫宸之
視聽亟祛綠水之波瀾千室以寧豈獨逭承宣之責一

方懷惠又兼明覆燾之恩惟帝矜憐鑒人歸命

禳水災設醮青詞

萬物皆係於天五行初一日水流不軌道害欲沉堤非
人力所能支吾繫神造為之主宰式敷誠懇仰叩昭明
伏念臣職在河防分先士卒惟賦才之甚下固用智之
不先載顧狂瀾遽有漂山之勢雖殫狂力渺無由地之
期豈徒深曠職之憂殆且有墊溺之惧仰祈陰祐俾即
安流沉溺不搖浮梁益固息譴訶於厥職省勞費於攸

司

祈水退設醮青詞

天不私於愛物人無告則呼天比者雨潦既瀦川流暴
溢鸛鳴於垤未瞻杲日之光城復於隍幾有襄陵之患
命且危於晨暮力已竭於捍防敢謁真宮仰祈元聖惟
冀享其精意矜此下民詔風伯以驅雲遣波神而洩水
復變桑麻之野不為魚鱉之隣永賴生成敢忘歸報

祈雨 謝雨 祈雪

祈雨設醮青詞

張參政

木饑水旱雖闕冥數之推移金簡玉書能拯含生之疾
苦輒披危悃仰瀆高靈伏念臣叨領帥藩未周歲律辛
姦偷之屏跡期間里之奠居脫死之民力耕者無幾垂
成之稼計日而望收自夏至秋不雨踰月飄風震蕩雲
欲歛而還開烈日炎威泉有源而亦竭嘉穀焦槁而就
盡老農籲號而莫聞富室已閉糴而幸災米商亦騰價
而射利將成赤地難逃饑饉之憂且惧綠林復起椎埋

之慕由臣非才假守無德及人刑政或恐干陰陽之和
精誠無以格幽明之祐靡神不舉徒自竭於愚衷謂天
蓋高終必從於人欲是用即仙聖飛昇之故地嚴高真
館御之殊庭從建淨筵宣揚秘笈伏願靈旂鑒顧亟禳
早魃之威膏澤誕敷曲借雨師之力沛然霑足蔚矣昭
蘓收薄稔於桑榆豈云小補救餘生於溝壑永戴鴻恩
祈雨設醮青詞

鶴鳴九臯上雲霄之不聞蟻居大澤知陰雨之方來蓋

動蠕之慘舒皆範圍於覆載民之苛瘠帝實矜憐伏以
八卦位而四時成六氣和而萬物得因其材而篤焉則
易為力非其時而望之則無見功敢殫祇祓之心倘動
昭回之鑒維是民社介乎江山以陂澤為家以稻稭為
命仰口而哺者蓋且十萬塗足而耘者逮其惛嫠夏方
用事而養禾土則溽暑而不雨失此機會且為饑凶走
百神而告哀蒙小惠而未濟是用洗心虛寂戒日吉蠲
款帝昏之崇高請民命於溝壑惟天地實民父母忍赤

予之渴飢雖山川能出風雲必有司於歸令恭惟成就
萬得照知四方顧哀下土之黔垓北鴻鈞之造錫予膏
澤躋登豐年重念賤微一介之臣典司百里之命傾投
五體瞻望紫宸無任祈天俟聖激切依歸之至

祈雨設醮青詞

熊子復

上天愛物必令萬彙之蘇小吏字民願救一同之歎仰
拔真宰俯控危衷維此暨陽荐罹旱歲臣比初達於封
境即親視於郊原麥苗雖出而悉已萎黃溪港不通而

僅存涓滴持百錢糴三升之米多入糶糠越數里汲一
罌之泉半和泥滓畎畝坼裂不堪鋤犁室廬空虛無可
貨鬻念荒時之難度惟造物之能蠲祇即琳宮企迎瓊
馭伏願雨雪之滋潤慰田野之焦熬民所欲天必從諒
蒙休應今以始歲其有庶望小康

祈雨設醮青詞

晁子西

為政不善害於時和自夏以來再以旱告固知上天不
宜屢瀆每念荒年實有可虞豈惟轉車人徒之屬連無

以奉饗亦恐父子兄弟之離散不能為邦願憫夏畦久
勞而未償無使秋稼垂成而或敗歲則大熟民可小康

祈雨設醮青詞

林豈塵

農心閔雨深懷失業之憂吏職承流敢殫責躬之請俯
輸悞悃仰瀆高明伏念蕞爾莆城瀕乎海嶠地狹半涵
於瘠齒人稠惟事於耕耘倘田疇之不收則溝壑之立
至梅蒸失潤秧插已枯噉噉既嘆於如焚慄慄實深於
若槿謹延真馭敬集靈場豈能出力以為人且務齋心

而謝過伏願乾坤降鑒畢月爭輝雨澤應期願解龜文之坼秋成在望可占魚夢之祥

祈雨設醮青詞

十日之雨久愆時若之期八口之家行失西成之望禱羣祠而精神未格諒百神之譴怒未休吏雖無良宜獨當於災咎民亦何罪俾重困於凶荒惟昊天有育物之仁惟上帝體好生之德若不籲歸而漑懇曷致監觀而俯從敢因舊儀祇薦誠悃伏惟元功不宰至道無私用

昭善應之休以救如焚之勢作為甘澍潤澤嘉生周寰
宇以廓清沛田疇而霑足下全民命載釋吏憂天地交
而萬物通已除凶歲寒暑節而五穀熟佇報豐年

祈雨設醮青詞

民之貧困未有甚於此時田無斂收則使餓於我土惟
天眷祐以時雨暘乃自是月以來遂致膏澤不下田畝
之苗莫立隄閼之水未通今者部封惕焉憂懼倘三日
之不雨必百穀之無秋如此閔閔農工丕降汝罪告於

皇天后帝寧丁我躬咿喔以祈隕越於下

祈雨設醮青詞

歲事至重惟天實為民食不豐繫吏之咎仰瀆窮高之
聽敢陳懇請之辭伏念流行之災雖云代有太甚之旱
亦或可推臣等泣官於茲奉職弗謹惟恐失政不能致
和故使四境之間至於連月不雨懼有槁苗之患莫救
嘉穀之傷深憂如薰彌祀不効其用輒遵道教恭設科
儀伏願享此忱誠鑒其瞻仰錫以霽霓之澤助夫稼穡

之成若乃亦有秋是為農夫之慶則何以卒歲不起小
民之咨此如微臣實受厚福

祈雨設醮青詞

雲霄高遠聽無卑而不聞螻蟻細微必有誠之可格眷
茲州境連屬歲荒萬口嗷嗷慮深填壑三農閔閔志切
望霓雖羣祀之徧修尚甘澤之未應仰憑道力恭叩天
閣伏願上帝垂仁諸天降鑒震雷出令盡興久蟄之龍
破塊流恩一洗將枯之麥

謝雨并祈穀青詞

熊子復

早當七八月之間比殫虔禱雨既三五日以往仰荷靈
休有開必先無德不報庸即琳霄之雨聿遵瓊簡之科
恭設淨壇企延飈馭爰念黍苗之未實尚憂螟螣之為
災民所欲天必從願畢垂於乎佑今以始歲其有庶薦
格於豐穰

謝晴青詞

九月築圃方興南畝之歸三日為霖或作西成之害天

不言而善應民所欲而必從
瞍瞍其陰蠢爾一時之藥
杲杲出日驪然百里之和
帝意何私人心易感謹輸
丹悃上瀆紫霄神之格思
仰九霄而難報物其多矣
庶萬庾以咸登

祈雪設醮青詞

天施地生既莫知於所報
旱乾水溢尚未免於有求
敢緣覆載之恩用竭吁嗟
之懇惟趙之北自東以來
雲欲族而遽收雪嘗降而
未渥雖徧走羣祀之衆曾
莫肯聞

而仰叫高窮之嚴蓋不得已伏願上清降鑒諸聖感通
號令川嶽之靈奮起龍蛇之蟄沛為膏潤澤此焦枯冀
蒙父母之慈不違螻蟻之願

祈雪設醮青詞

上帝降觀善於救物下民靡告危則呼天此者時雪既
愆宿麥將槁吏雖不德人亦何辜敢瀝丹衷上祈真聖
願施一尺之澤俯紓千里之憂益罄齋虔少酬蒙覆

祈雪并禳火災設醮青詞

高天在上故無棄人至誠如神可以事帝比者時方卒
歲陽反代陰水不堅凝木多燥槁牟麥已播未霑為瑞
之滋綆缶相望每有救焚之恐敢伸醢設共罄懇祈庶
有感而必通將轉禍以為福伏願三清覆祐列聖鑒觀
高澤應乎豐年熒惑循於常次揚燠不作無徒薪曲突
之勞盈尺既優遂飽食逸居之樂共荷生成之賜不忘
歸報之勤

追薦

薦父九幽設醮青詞

無父何怙可勝痛割之情謂天蓋高俯聽忱恫之懇幽
明雖異祈報則均伏念臣亡父某人弗享遐齡條歸冥
路居諸云邁追悼何窮於其得疾之時嘗有祈衷之請
謂天官赦罪時適際於中元而人子愛親心敢忘於一
念薄陳清醮少答高窮盡除疇昔之尤或在超生之域
禴祭實受其福願竭誠心死者不可復生姑償夙願

薦父九幽設醮青詞

高穹冥漠惟誠意可以潛通滯魄幽沉伏慈光為之下
照顧茲懇切敢不皈投伏念臣亡父某向佛精勤奉真
龜勉叨蒙仙籙願享遐齡何其得疾之弗瘳遽嘆養親
之不待雙輪易邁三七俯臨輒伸哀悼之誠用薦幽冥
之地惟願九天原赦承拔亡超度之恩百苦消除享自
在逍遙之樂

薦父百日設醮青詞

年始及笄預卜有家之願生何報德俄虧陟岵之瞻踏

地靡圖籲天敢告伏念臣亡父某慈祥賦性朴直謀生
豈云無妄之災輒有不虞之禍鑒徒屢試雖百藥以無
功夢則先知蓋十年而以驗固死生之有命在幼穉以
何堪適當弗反之旬爰起悼亡之感尚期大造俯格微
誠憐人子荅親之心曲垂昭鑒赦先父既往之咎俾脫
沉淪

薦母設醮開壇青詞

枕塊寢苦方深念母披肝瀝膽敢不籲天願憑不宰之

功少度無邊之苦伏念臣母自從無始爰及有生於身
三口四之中造人百已千之業奄歸長夜恐滯幽津重
惟後嗣之積愆大惧往年之元路倘非道廕孰洗罪根
乃修靈寶無上之齋庸冀昊天罔極之德伏願三清上
聖曲垂赦過之恩十極高真同賜度生之力速招滯魄
使濟法橋此界地方解百生之冤結人門天上還一念
之本真皆與含靈同歸道岬

薦母設醮散壇青詞

卷七十四
囂塵湫隘肅陳擁霧之壇惚恍希雲若覩排空之馭顧
人寰之甚濁諒天衆之難掩函笈散音真遊反旆念蘋
繁蘊藻之猷雖或致虔而香火瓜華之間尚多弗敬祈
欲赦罪尤賴降衷願捨過以錄功惟濟生而度死速引
慈親之去識徑上三天少酬人子之孝思未沒九地

薦母設醮青詞

日往月來倏爾再期之及肝枯腸裂莫名方寸之誠敢
求天上之玄靈庶薦九幽之滯魄是宜延羽衣於麻室

開寶軸於琅函聿修黃錄之宜用竭丹心之懇祈聰明
之俯聽冀風馬之來臨伏念臣妣某棄館捐生不覺遷
延歲月而孤子某含恩報德當求薦拔津梁思令見性
以生天莫若回心而嚮道庶幾脫地獄冤愆苦生人間
善樂緣引援孤魂滌多生之罪垢開明一性獲大道之
歸依

薦母設醮青詞

天天棘薪痛劬勞於母氏蕩蕩上帝宜濟度於下民敢

瀝血誠仰干洪造伏念某一違色養六換齋辰禍及凶
殫天摧地裂念平生百為之際雖切自修而宿業三世
之通未容寡過欲期解脫可不皈依庸大啓於蘭場庶
少延於飈馭三薰三沐載過載瞻伏願八羽龍軒暫去
玉京之邃九光鶴蓋俯臨蓬戶之卑曲鑒勤拳溥垂救
拔

薦母忌日設醮青詞

母兮鞠我懷昊天罔極之思祭則致嚴盡大孝終身之

慕敢因諱日輒啓清場憑度人渺渺之誠格福善高高
之鑒伏念臣學疎且怠才短無能徒空誓志之堅未遂
揚名之顯晨昏定省雖諧慶侍之勤朝夕思維實慙再
生之報九回腸而不足一跬步以難忘惟念崇修可伸
追想偶緣道行欲執牒以離塵用設靈神因濟人而薦
識伏願高穹垂聽上宿下臨迂龍鸞其盛之軒俾令快
覩馨蘋藻至微之禮庶遂懇求

薦母九幽設醮青詞

窮則呼天仰賴無私之鑒母兮鞠我難甯罔極之恩謹
瀝丹衷上干洪造伏念某先妣沉迷世網淪溺愛河前
因病疾之躔莫藉扶持之力爰披心素跪許醮羞豈期
一夢之不還俄遽八旬之俯及脩藻芹而是賽竭螻蟻
以致恭式按冲科敬延真馭願憑妙善併薦幽魂三十
三天獲遂往生之樂百千萬劫永消過去之愆

薦妻九幽設醮青詞

科傳黃宅會啓特於九幽魂度朱陵身必超於十極輒

輸危惘上瀆高聽伏念臣妻安人樊氏夙慕真詮久承
道蔭遽染河魚之疾旋興隙駟之嗟念積習愆尤或尚
標於黑簿肆披陳情懇用虔拜於綠章延羽士於雲壇
秩醮筵於衡宇茭龍傳信柏簡陳儀焚百和之寶薰諷
九天之隱韻歡迎瓊駕俯享蘭羞搔拔一靈俾超諸趣
玉京金闕步八景之雲霞圓嶠方壺住上山之樓觀

薦妻賽願設醮青詞

句曲名山隱茅君之鵠馭崇禧珍館棲玉帝之龍輶輒

澁丹表仰干洪造伏念臣妻某氏早依道蔭夙慕真詮
未屆中年遽淪長夜嘗禱仙壇之秘許修寶籙之儀今
者特啓淨筵庶酬初願經誦琳臺之札香騰金獸之煙
柏簡授符茭童傳信所期滌除罪垢升濟神明罷對三
官名默消於黑簿超生七映魂速度於朱陵

薦拔設醮開壇青詞

天高高而在上覆既無私道蕩蕩以難名感宜有應輒
持精一仰格清光况凡懇之是求增哀情而愈切今則

醺壇嚴設公宇肅恭風颺感往之悲香滌剖城之潔敢
仗羽衣之侶上叩帝閭庶延仙從之車下垂法席天人
相際存沒有干伏願迂龍鸞甚盛之軒俾令快覩歆蘋
藻至微之禮得遂勤依

薦拔設醺散壇青詞

嚴潔奉天知錢齋之惟謹質明行事慮繼燭之不恭省
已未安瀝誠再瀆伏念臣因悼亡之無益謂訴帝之可
求尤懼乖違反招譴怒適丁罷散聲竭卑衷願望鑒之

海容盡捐細故當仙車之雲歛廣賜哀憐俾亡室王氏
寃上徹於天庭魂速登於仙界羣哀有訴同體無悲但
居螻蟻之微永念丘山之賜

薦拔設醮青詞

死生有定予不能為其親私窮苦方深天尚或從於人
欲輒傾哀訴仰瀆高明伏念臣久稔愆尤荐罹憂患疇
昔趨庭之訓已失先傳中年陟屺之思復違志養禍一
至此痛將奚堪斬然縗絰之中非敢愛死惟是蒸嘗之

事尚忍偷生聊憑拯拔之儀少致劬勞之慕洪惟高鑒
普濟迷途赦既往以維新願除罪苦盡未來而不作一
洗業根

卜葬還願青詞

百身何贖痛銜罔極之哀再世有歸陰賴至仁之相敬
陳謝禮少畢愚衷伏念臣不孝之罪上通於天沓來之
禍駭聞於世十年縲經四壁几筵雖隕滅而尤悲亦哀
歸而僅屬扶持忍死勉送終當因宅兆之多疑輒叩

昊穹而請命神明降鑒龜筮協從聿修大事之襄敢効
初心之報伏願照臨有赫覆載無私旁燭幽都等先靈
於樂國橫流惠澤回生意於寒根誓罄餘齡仰酬洪造

焚黃設醮青詞

哀深悼父懇迫歸天永惟劬勞之親生稟慈惠之性區
區捐已汲汲振貧躬行而莫矜其能厚施而未食其報
嗟乎不孝之罪大戕此嚴誅之亟來予職莫修俾遂棄
終身之養君恩雖重不及汗再命之榮閱歲月之奔馳

俄周祥而遄至念非歸依至真之大道何以少報罔極
之深恩爰仗羽衣式遵藥笈敢異妙力以通於幽明庶
幾恩封不間於生死何勝蓼莪之痛輒犯蕭斧之威方
伏苦塊如臨水谷

薦夫設醮青詞

衆生苦凶沉淪未免於三塗大道恢洪救拔普同於一
切欲悼亡而莫及期薦往而有由疾首痛心神魄墮越
呼天叩地涕泗滂沲輒傾丹素之誠爰告紫金之闕伏

念臣妾夫久湮選調曷究宏途五千方謂富貴之年妻
妾未敢棄去一日忽嬰跖盤之疾砭礮施之罔功朝露
既晞悲風徒切扶靈輜而欲去恐旅魄之弗招忽託夢
於同僚祈追修於上果用仲嬰慕式仗聖慈塵翳永消
靈明獨耀蠲除拘滯啟無遮無碍之道場超度往來傳
長樂長安之真境尚期幽魄俯鑒忱誠

薦夫設醮青詞

中元紀節聿垂宥過之文寶席躬薰少盡酬恩之意悵

既虧於形影思升濟於神明伏念臣妾亡夫某早出寒鄉偶通朝籍奄辭昭代不享遐齡垂年之老母可悲別宗之繼子不振重服即吉餘哀尚新僅存未亡之人敢效從死之妾凡可追導罔殫薦修夢若平生言猶有負特延開士恭按冲科伏願至鑒所臨微誠不隔綠章既徹黑簿盡除累三天之秘可通盡九地之幽必照庶冥福之有助竭危懇以甚哀

薦弟還願青詞

孫仲益

天地之恩螻蟻之微何報兄弟之義手足之愛所鍾仰
瞻咫尺之威俯罄再三之瀆冀垂哀憫以鑒愚衷伏念
某始自幼年恭承嚴訓一門十口同產三人教以詩書
安於貧賤布衣草履糲食藜羹相與終身今猶在耳已
乃觀兄蚤歿得偕峴弟俱存爰自青衿以至白首中緣
際會過冒寵榮嶺海竄流骨肉阻絕旋蒙解網獲遂首
丘誓言躬耕不復求仕饘於是粥於是無一日不從歌
於斯哭於斯蓋二紀於此云何不淑奄棄而先念其忍

死之言固嘗有夙昔未償之願迨此卧痾之日亦屢申
吁嗟歸命之求用是汎埽家庭延登道侶悉從治命不
爽初心高誦靈篇躬羞淨供望三清而稽首仰列聖以
馳誠懼其多生身口意之間慮有一切貪嗔癡之罪念
此急難之情至切矣俾從逍遙之樂以超然一死一生
已抱終天之恨三薰三沐敢忘伏地之恩

薦男九幽設醮青詞

黃泰之

七情顛倒沉冥利害之途一念皈依度脫死生之境爰

披誠懇仰叩高真伏念某次男某愚不知方學未聞道
心猿意馬不禁奔馳飄瓦虛舟無情繫觸冤冤未解業
疑三世之通種種俱融醮仗九幽之設肅延羽屬密崇
玄科以清淨緣破昏迷障頓令去魄隨符簡以超昇更
保全家與歲時而開泰

五百家播芳大全文粹卷七十四

欽定四庫全書

集部

五百家播芳大全文粹卷七十五

詳校官侍郎_臣劉躍雲

助教_臣常循覆勘

總校官編修_臣王燕緒

校對官中書_臣范鰲

謄錄監生_臣桑英

欽定四庫全書

五百家播芳大全文粹卷七十五

宋 魏齊賢

葉 棻同輯

釋疏

聖節

興龍節道場疏

李成季

律當大呂潛通夢日之符月應上弦燦發流虹之瑞篤

生真聖允契昌期恭惟皇帝陛下秉哲自天維時當極
對三靈之休眷席六帝之丕圖敘陰陽風雨以成和媚
祖考神示于安樂萬國熙洽一歸下武之繼文百姓謳
歌欣見重華之協帝俯迎誕節大啟法筵敢憑天竺之
文上祝南山之算伏願神通十號共扶不拔之基壽考
萬年永據無疆之福

乾龍節道場疏

劉夷叔

仁孝二稱幽明所覆祈延一意臣子則然孝慈淵聖皇

帝陛下伏願神聽靖共天從格保閱帝齡之所昇共僧
劫以難量天子無心縱適九夷之陋周王念國終期八
駿之歸

乾龍節開啟疏

任子淵

六位時成爰紀誕彌之慶萬邦作乂嘗蒙覆露之恩先
即梵宮肅陳秘典孝慈淵聖皇帝陛下伏願茂膺神策
申錫夢齡海上瑤霞亟返函池之御天邊樓觀還增花
萼之輝

乾天節開啟疏

玉厯垂鴻啟千齡之誕序金言滿義衍諸佛之真筌庶
嚴最上之因庸保無疆之祚恭惟皇帝紹天景命持國
永圖聲明燁乎潤希德惠浸于遐末屬乘離之首氣紀
鳴社之初期昭文相公史館相公集賢相公參政侍郎
謨九德之中翊萬機之會慶儲靈于若水擬頌聖于華
封廣披法藏之文大集祇園之供雨花零座潮梵騰音
覺塵趣之普迷成度門之絕品皇帝伏願如天之壽如

日之升七寶千里永護玉毫之相衆星拱北長扶紫極
之尊相公參政伏願與國榮華俾民富壽任常專于柱
石功早載于鐘彝然後願霑勝利於有生浹太和於無
外

天寧節功德疏

鮑欽正

穆清受命肇興出震之祥厯數在躬茂對卜年之永矧
自璇霄而撫世紹膺鴻號之長生恭惟載肅之辰重祝
無疆之壽伏願丕成景祚增錫純禧時乘六龍接統千

歲皇天佑於一德克享神庥夢帝與我九齡永為民主

天寧節功德疏

孫仲益

儲精御極實膺出震之期彌月開祥敢效後天之祝歸
依淨境演繹微言庶憑上乘少報帝力皇帝陛下伏願
垂衣而治如日之中為天下君以幸難逢之會使聖人
壽益遐無疆之休長發其祥紹降於聖緒誕彌厥月襲
慶於休辰仰奉至言用形延祝皇帝陛下伏願鴻圖有
永景命惟新占南極之老人有光其應同西方之壽佛

無量斯年

天中節道場疏

執徐肇歲再逢甲觀之祥
唎梵宣揚虔啟樞庭之會
跪瞻調御恭祝壽祺伏願
申錫無疆聿懷多福靜柝
克寧於榆塞包桑永奠於
蘿圖太乙儲祥浹靈休於
四海禔神錫羨綿景貺於
多男

天中節道場疏

蕤賓紀律式屆長贏之期
華渚流星載遇誕辰之節
恭

仗竺乾之侶虔持方廣之文義克謹于在三福可祈于
時萬皇帝陛下伏願赫赫在上穆穆迓衡四圍不聳于
煙塵九屆坐安于磐石明良庶事端合皋陶之歌富壽
多男願效華封之祝

興龍節道場疏

信義在躬已協天人之助乾坤莫報更資覺法之因爰
屆誕期用伸至願皇帝陛下伏願憑覺皇之外助慰臣子
之內心如河海之靜淵與天地而長久

興龍節功德疏

蘇子瞻

上帝垂休真人誕降乾坤合契永為喜慶之辰草木何
知舉有欣榮之意矧惟遭遇獲侍清閒不緣梵釋之因
曷致涓埃之効伏願皇帝陛下受天之祿如川方增奄
有漢唐之封疆倍萬唐虞之壽考永均介福下及含生
乾元節功德疏

炎精據德有開千載之祥海藏繙文式暢諸天之蘊表
崇因於衆善期輯福於皇圖恭惟皇帝陛下纂祖丕基

欽天明命仁恩之厚寢鼓舞於含生風化之醲率甄陶於殊類屬應期於華渚溥歸祝於丹宸樞密相公樞密給事樞密侍郎韜經邦之謀履當軸之任祇園啟會款有相之莊嚴靈鷲傳音締無盡之功德皇帝伏願德如天覆明並日升萬玉趨庭長接塗山之會七珍園座永居沙界之尊樞密相公大行給事侍郎伏願炳鐘彝之勲際柱石之寄轉長世之休業享上天之百祥然後願車書所同霜露所隊共嬉昭旦咸集殊休

乾元節功德疏

宋子京

夏管凝薰月樞幾望是惟穀旦載育冲人徇歡戴于羣
情用題名于盛節然且上欽列聖仰荷先慈顧復眇躬
纂承丕厯交欣懷而罔寘惟正妙之是依用飭先期
克嚴普供開玉題宇潮偈宣音庶歸報于自生兼蒙仁
於俾父清場祇被大覺照臨

天中節道場疏

鄭民望

流虹飛電幸逢五百歲之期就日望雲願上千萬年之

壽月將臨於穀旦誠敢達於慈章恭惟陛下德同於初心游於淡天高地厚固綿長有永之基松茂竹苞極悠遠無疆之祚

天申節道場疏

化國日舒以長正薰風之入奏天子父尊之至慶彌月之將臨敬脩最上之乘仰祝無疆之壽恭惟陛下受五日一朝之養符三呼萬歲之祥汗竹南山莫紀聖功之大桑田滄海未傾壽筭之深

乾龍節道場疏

鳴里社以協祥適冠長嬴之候啟法筵而伸悃敢憑調
御之慈共披海藏之文用介河沙之筭孝慈淵聖皇帝
伏願三靈孚佑十力護持造父執鞭還駿驂於漆澤廣
成傳道超壽量於空同

乾龍節道場疏

葛謙白

祥標虹渚載逢震夙之辰咀暢魚山將散祝筵之會載
糾一衆恭禱萬年孝慈淵聖皇帝伏願保合太和緝熙

純嘏星迴日轉早還法駕於具茨地久天長永奉宸歡
於花萼

聖節道場疏

鄭民望

誕彌厥月開虹流電繞之祥於萬斯年獻地久天長之
祝仰憑願力同贊睿齡皇帝陛下伏願冀歷長新羅圖
益固脩文偃武兼綏夷夏之民拱手垂衣永祚神明之
主

承天節道場疏

李成季

妙覺能仁出現于大千世界深慈救物宣說于十二部
經形悲智以悟羣生示辨才而持正法龍宮海藏爰秘
于經文東夏南闍式傳于象教所以植衆德之本結淨
土之緣趨三寶以皈依發一念而迴向六時讚唄克成
上善之因四事恭勤用廣有為之福伏願皇帝金輪益
固玉葉彌芳體大德以庇民推至仁而御宇深信內典
入不二之門安住佛乘享無疆之壽永保後天之筭長
為諸夏之尊然後願寓縣承平類四禪之清淨朝野多

慶蒙百福之莊嚴止戈載洽於昌期拂石莫量於浩劫
凡居法界盡證菩提

承天節道場疏

六通應供從兜率以降生三藏契詮假貝多而流布所
以作羣迷之歸救述大事之因緣自夢叶于金人始俗
傳於像教香花四事式重於焚脩鐘梵六時聿嚴於齋
供爰值無邊之福用成衆善之因伏願皇帝位等金輪
功周妙界道齊千佛澤被四生邊陲載戢於五兵府庫

常盈於七寶御世比能仁之福統天同大梵之尊八部
歸依六戎款附華封祝聖克崇萬壽之期震旦興王永護
一乘之法然後願朝野多慶興禮樂于三雍寓縣無虞
息煙塵于四鄙載洽淳熙之化同躋富庶之鄉凡在含
靈並登正覺

乾龍節道場疏

汪彥章

祥開甲觀將臨震夙之期會啟樞庭預慶延洪之祝諷
三乘之密記演九籥之真科恪傾寸誠懋祈景貺皇帝

陛下伏願與天無極如日之升歡聲長浹於東朝妖祲永消於北極九功惟敘斂五福以錫民萬歲成純奉三無而勞下

天申節道場疏

篤生元聖天申命而用休虔祝萬年臣歸美以報上廣延開士恭啟法筵庶憑諷唄之勤式薦麾鴻之社皇帝陛下伏願景命有僕受福無疆常陳泰階之六符不用天山之三箭何知帝力永聰康衢之謠請壽聖人長享

華封之祝

興龍節功德疏

璇厯儲休風啟千齡之運絲囊紀節爰均萬國之歡雖
遙汾水之遊敢後華封之祝恭惟皇帝陛下性率恭儉
德兼文武自傳序于祖宗即軫憂于宵旰力收羣策銷
禍變之胚胎躬蹈危機拯生靈于塗炭方人心之愛戴
忽天步之艱難左袒雖堅北轅莫駐適遇流虹之節尤
深向日之誠是仗勝因仰資鴻筭伏願皇帝陛下顯膺

景命光復丕圖脫陽九非常之災享大千無量之福瑶池宴畢御八駿以遄歸美里書成用六爻而致治

乾龍節功德疏

鄭民望

金風雖屆火德未衰序協正陽運符元后宸庭稱壽義方篤于呼三帳殿蒙塵厄尚淹于陽九曰士曰庶且喜且悲藉佛力之無邊贊皇圖之有永三光復彩翠華旋沙漠之征萬國歡聲香火副華封之祝

乾元節滿散疏

宋子京

若水開祥契上聖千年之運祇園脩供資能仁衆善之
因恭憑無量之福田仰祝延洪之睿筭伏惟皇帝陛下
體元行健累洽重熙荷靈命之眷懷迪先謨之懿鑠昭
德而誕膺純錫敷文而交舉上儀在璿克集于歲功鳴
社爰臨于誕節萬邦咸入九敘惟歌某翊亮天工協宣
皇極率厲同寅之至克申順美之誠當華渚之令辰獻
堯封之善祝躬趨寶剎特啟淨筵四事香花羅寶階于
朏率六時鐘唄梵唱于魚山繫勝果之圓成佑鴻基

于悠久皇帝伏願宸居樂豫壽域歡康固守位于金輪
齊卜年于妙刼法雲溥蔭將德澤以長周慧日揚輝等
皇明而久照某官伏願茂膺戩福益顯嘉庸彌宣調鼎
之勲上贊垂裳之治然復願寵均衆類恩浸寰區官師
咸罄於忠規海甸並躋于富庶大包瀛表細及昆跂仰
沐弘慈同茲饒益

天申節道場疏

祥開甲觀恭逢震夙之辰會啟祇園共獻延洪之祝設

伊蒲之淨供繙貝葉之真銓庶竭誠忱式資孚佑皇帝陛下伏願赫赫在上穆穆迓衡則百斯男綿本支而有永宅三有俊輔宗祏於無疆

天申節道場疏

葛謙白

五百年而有作天開甲觀之祥三萬歲以成純人効華封之祝輒款淨宇恭締法筵庶仗齋薰仰祈昌熾皇帝陛下伏願三神孚佑四海會同邊廷無振柝之虞寰宇叶維魚之夢既多受祉享穰穰簡簡之繁則百斯男鍾

蟄蟄繩繩之慶

聖節道場疏

江虹輝渚感聖緒于昌期貝葉繙文輯覺緣于衆妙敢
資法力上薦皇休皇帝伏願光御帝符長綏邦祚恩若
慈雲之覆祥如慧日之升萬善觀心已會祇園之果千
齡祝聖更同嵩嶽之呼

會慶節道場疏

蘭殿儲祥慶千齡之會祇園薦祉罄萬國之歡伏願皇

帝大寶齊斗極之高丕基倅磐石之固汗南山之竹紀
莫大之功勲閱東海之桑介無疆之壽福

天申節道場疏

火德運而啟造周興王業之瑞夏日至而肇生商立子
氏之符草偃舜風葵傾堯日伏願福祿之盛如川方增
功德之隆與天無極車同萬里陪西池阿母之遊統接
千齡應南極老人之瑞

天申節道場疏

孫仲益

火流周屋而肇興王之迹風入舜弦以開受命之祥玉
坐傳觴千官列侍寶坊脩供萬德同音伏願追五帝之
高蹤邁三王之遐躅降年有永見黃河千里一曲之清
受祿無疆聽嵩嶽萬歲三呼之祝

天申節道場疏

星火開祥當聖神誕毓之旦寶坊延祉罄臣子虔祝之
心恭惟光堯壽聖太上皇帝陛下道法自然心遊邃古
藏雷聲於淵默順帝則于希夷伏願日新又新既朔復

朔超大椿八千之筭爰久視以長生符靈芝三萬之期
配高明而博厚

乾元節功德疏

王望之

天祐祖宗之仁克肖其德世錫聖神之嗣全付有家應
交泰之亨期屬純乾之令月仰憑佛力上祝堯年恭惟
皇帝陛下性自聰明德惟恭儉雖強鄰之外侮實大運
之中興伏願睿知有臨干戈載戢鬼方遠遁克不待于
三年崧嶽歡呼聲屢聞于萬歲

天申節道場疏

祥開甲觀天申命而用休壽祝南山臣歸美以報上廣
延梵侶恭締法筵輒申翌翌之誠用禱穰穰之福皇帝
陛下伏願與天無極如日之升三邊無飲馬之虞四海
有夢魚之樂聲傳萬歲永符嵩嶽之呼慶浹多男願恭
華封之祝

天申節道場疏

襟祠飛乙既諧弓韜之祥華渚流虹允協電樞之慶恭

逢華誕申祝壽祺皇帝陛下伏願受福無疆降年有永
康衢擊壤咸臻奠枕之安邊圉橐弓永享垂裳之治

天寧節功德疏

祝咨謀

月紀應鍾允屬昌明之運星流華渚篤生神聖之君豫
啟秘庭增延淨侶仰企紫霄之御恭披玉笈之文伏願
皇帝陛下命與天長業同地廣擁三靈之密佑斂五福
以敷施一人慶而萬國咸欣百和焚而列真洞鑒躬聞
至道獨高黃帝之風富有昌齡願效封人之祝

天申節道場疏

王室之

清河九曲允彰兆聖之符靈嶽三呼實表歷年之命爰
即神明之宇具嚴道德之聞庶假勝因益崇睿筭伏惟
皇帝陛下至仁天縱盛德日新大安大榮福等岡陵之
固時萬時億壽齊箕翼之長下及含生共均休祉

太申節道場疏

孫仲益

炎正肇小年之永朱明紀彌月之祥凡我有生舉同是
日俯仰洪願叩真乘伏願繼明如日之升立極配天

之大獻華封人之善祝齊南山壽之不騫集阿蘭若之
妙因等西方佛之無量

天申節道場疏

赤伏題五德之期皇業紹千齡之統日從北至偕化國
之長風自南來共楚臺之快盍申善禱用叩真乘伏願
光堯壽聖太上皇帝陛下名高寶地千佛之經位冠玉
京羣帝之首按八龍轡而揖金母于瑤池之上駕五雲
車而摩銅人于霸城之東方期汗漫之遊又見蓬萊之請

乾龍節道場疏

李伯時

候正六陽羣目仰虹流之慶期先一月庶工紛鰲抃之
儀茂簡上帝之心敷聽輿人之論恭惟皇帝陛下聖猷
天縱威令風生主鬯青宮剛乘一索之震握符紫極明
開兩作之離亶為有道之曾孫宜享無疆之大厯肆披
蕊笈祇贊羅圖綿三萬里之唐封用茲宏賁過七百年
之周卜永享於休

天寧節功德疏

天幹三辰歲分六甲水生一而利萬物土居中而行四
時屬陰陽參合之期為仁聖本元之日是用即琳宮之
福地啟金籙之秘文有德者昌宜神靈之交相歸報于
上乃臣子之至情伏望上帝鑒觀衆真感格護太清之
高拱擁多福以來宗三百六旬每周流而不息千萬億
歲當永保于無窮

乾龍節道場啟

律中蕤賓時方盛于火德虹流華渚天復生于聖人敢

傾有截之心仰祝無疆之祉集六和之開士翻五竺之
秘文虔仗佛乘延洪壽筭伏願皇帝陛下孝友光于虞
舜聖仁叶乎帝堯文德誕敷坐致兵戈之偃息聲教四
暨更看車書之混同永與含生共躋聖域

會慶節功德疏

孫仲益

筦寢諸休瑞玉紀生商之候宇祠錫羨猗蘭開祚漢之
祥凡在照臨舉同慶賴伏願弓橐戈戢粟腐錢流驗泰
階六符之平畀彞倫九疇之敘農桑三萬里而永奠蘿

圖之固春秋八千歲而久符椿壽之長

聖節功德疏

黃魯直

電影旋樞瑞氣昔蟠于穹壤葵心向日頌聲播溢于華
戎躬詣寶坊廣延緇侶致上方香積之饌閱西竺貝多
之文罄竭愚衷崇修法供伏願今皇帝陛下睿圖鞏固
宸筭增隆日月無私煥天明於萬國椿松共茂班寶鑑
於千秋臣無任

後苑同天節道場疏

王岐公

皇運當天享羣元之大奉正陽表朔紀載誕之殊祥即
翠苑以敷筵諷金文之滿義實資勝福永祚昌期

聖節道場疏

鄭民望

惟天為大均蒙覆育之恩如日之升咸慶誕彌之節恭
依道梵仰祝帝齡伏願皇帝陛下齊久二儀並明兩耀
由中及外第申百福之章式舞且歌長奉千秋之燕

天申節道場疏

承承繼繼幅員嘉長發之祥鬱鬱葱葱龍虎擁會稽之

氣式時欽致厥月誕彌斂敷佑于帝齡宜欽依于佛力
一人有慶四海無虞澄紫邏之妖氛復黃圖之仙仗乾
坤再造續綿歷而日新日日新臣庶交懽撫宏休于萬
歲萬萬歲

天申節道場疏

日離東井欣逢載夙之辰龍起昆陽高啟中興之祚篤
皇家之再造僕景命之萬年注倚能仁維持熙運商丘
膺錄契靈武之昌期吳會揚麾溢春陵之嘉氣慶為民

賁壽與天齊

乾龍節道場疏

葛謙白

乘乾載誕節復屆于吹銅宣梵乞靈福每資于繙貝敢
列齋薰之品用申悃悃之誠孝慈淵聖皇帝伏願何福
不除其寧永永配盤古綿延之數叅萬歲以成純挺金
剛堅固之身同三光而不老

天申節啟建道場疏

林豈塵

景回北極慶流虹繞電之祥壽祝南山傾就日望雲之

衆恭惟光堯壽聖太上皇帝道存澹泊妙契希夷付黃
屋于非心詒燕謀于翼子雖宥天下不治天下固已仰
成然嘻聖人請祝聖人可無歸報况值誕彌之月仰憑
高上之慈伏願百祿是適五兵不試想聞中岳沸傳三
呼萬歲之聲雖老後天長享五日一朝之制

天申節滿散疏

不為天下先默定老聃之道請祝聖人壽難忘堯帝之
仁恭即璇宮仰祈睿筭恭惟皇帝陛下太上貴德神人

無功付黃屋于非心享玉卮之為壽矧值流虹之月恭
傾載日之心伏願受福無疆景命有僕十四月而生帝
已際昌辰八千歲以為春莫窮神筭

聖節道場疏

紫電流輝慶一千年之嘉會紺宮禱福啟三十日之妙
緣用資北闕之昌期爰賴西乾之惠力恭惟皇帝陛下
欽承禹道克廣文聲睿知有臨履至尊而制六合神武
不殺安中國以綏四方其著顯庸自貽哲命茂迎令節

祇款慈容佛日當中請祝聖人之壽堯雲在上對揚天子之休

天中節道場疏

韓子蒼

職在禁途雖有愛君之意身居祠館實無報國之方惟冀覺慈俯從誠悃皇帝陛下伏願壽躋時億光照大千拱手垂衣永御浚都之宮殿投戈散甲盡朝沙漠之戎羌更推諸福之餘下逮四方之遠

聖節功德疏

卷七十五
繞樞布瑞肇開萬世之祥流渚呈輝久協千齡之運將
臨令節回向真乘潔蒲塞之珍羞演金仙之奧曲冀憑
梵力庶獲妙因伏願皇帝陛下聖壽無疆遠比南山之
永蘿圖益固常齊北極之尊

聖節滿散疏

皇皇后帝佑下民而作之君勉勉我王有大德而得其
壽按瓊笈銀題之教延鳳姿日表之年恭惟皇帝陛下
乃聖乃神克明克類體堯蹈舜而立綽綽然有餘裕哉

降周迄孔以來皞皞乎不可尚已當乾健龍飛之會實
革孚虎變之辰恪瞻北極之尊共効南山之祝景命有
僕方父老而子從受福無疆固天長而地久

聖節開啟疏

張稽仲

寶厯會昌颺輪降格闡洪猷于億載錫純嘏于綿區惟
上帝之顧懷眷大君之欽翼爰崇令節式紀殊休啟堯
率之祇園結如來之妙果仰憑正覺聿奉成因陳十地
之香花會五天之龍象皇帝陛下伏願金輪演化玉燭

宣和堯齡永固于南山禹會常趨于北闕

聖節滿散疏

帝出乎震顯逢千載之期道兼于天丕格三靈之眷舉
彝儀于蘭若紛善頌以葵傾恭惟皇帝陛下齊聖廣淵
剛健篤實恢張政紀用奉若于先王裒對神休俾緝熙
于純嘏方御乾龍之居上永享豐照以宜中申衍遐齡
寅資定力受命不殆蓋將以天地為常與物皆昌豈特
若松栢之茂

會慶節啟建道場疏

林豈塵

天佑民而作之君慶誕彌于良月臣歸美以報其上繼
善頌以封人敢伸一介之誠願祝大椿之壽恭惟皇帝
陛下道參羲昊德配乾坤執虞舜之兩端躬武王之達
孝坐撫中熙之運肇開長發之祥臣等謹叩高真仰祈
遐筭伏願後世難老永符萬歲之呼如日之升長對千
秋之節

會慶節滿散道場疏

虹流電繞肇基長發之祥地闢天開大啟中興之業仰
祝龐鴻之作輒伸螻蟻之誠恭惟皇帝陛下孝通神明
道叅覆載會文武父子而處慶堯舜歷數之傳臣等謹
詣琳宮虔修雲笈伏願壽齊箕翼業等山河漢室重光
增授泰元之笈周家過歷永占郊鄔之龜

天申節功德疏

任子淵

接千齡之正統為天下君傾四海之歡心使聖人壽敢
因盛旦祇奉真乘應憑梵釋之因少効涓埃之報皇帝

陛下伏願順帝之則先天不違受祿無疆如大川之方
至降年有永配南極以彌光

天申節功德疏

鄭明舉

為天下王允屬守成之運使聖人壽溥騰歸美之歡寸
葉傾陽涓流宗海崇妙因于有慶綿睿筭于無疆恭惟
皇帝陛下叙功覺民續志敷極文思格于上下孝弟通
于神明集命應期發祥標旦萬物覩而咸遂四方賀以
皆欣伏願日升月恒同照臨于不息天長地久並覆載

于自然

天申節道場疏

韓子蒼

聖神臨御得率土之歡心梵釋興慈副羣生之願力敢
憑聖果助祝蕃釐伏願皇帝陛下壽與天齊福踰地厚
時乘大輅肅迎二帝之歸奄治中區永受百蠻之貢丕
圖綿固庶品均安

天申節道場疏

鄭明舉

生德猗蘭符上天之景命繡文貝葉資秘洞之靈科庸

竭微誠仰伸善頌恭惟陛下伏念道參化育德協古初
罄億兆民之心齊上華封人之祝享千萬年之壽長為
天子父之尊

天申節道場疏

星樞感聖慶符休運之期海藏繙經欽奉真乘之教
同率土仰祝後天恭惟陛下伏願穆若無為超然高蹈
祥開穀旦篤周祜于萬年慶衍羅圖燕商生于百世

天申節功德疏

汪彥章

甲觀開祥方嗣無疆之歷梵宮營福或憑大覺之慈載
逢彌月之辰咸聽後天之祝皇帝陛下伏願紹恢大業
永御丕圖綿帝力以常新齊佛壽之無量卜年過歷方
同周室之興致治以仁遠邁堯齡之永

乾龍節功德疏

真主應期鍾正月純陽之氣羣臣歸美祝後天難老之
祥方清蹕之在行宜神明之加護爰即金仙之館共緡
貝葉之文伏願皇帝陛下善保清躬少須休運與襄城

之衆馭亟問迷津取赤水之遺珠再臨大寶

聖節道場疏

張稽仲

鳴社告符流虹布瑞啟太平之景運開上聖之殊祥式
在嘉辰宜形善頌即金仙之寶剎探貝葉之真詮庶憑
西土之勝因仰祝南山之睿筭伏願皇帝陛下丕圖增
永寶祚無窮邁成周過歷之期叶夢帝與齡之兆一人
有慶罄海寓以咸歡萬壽無疆與宗祧而共久

聖節道場疏

宋子京

薰風協序寶月向盈記祥虹華電之期著金鑑露囊之
盛虔趨福地大啟真筵罄朝野之歡忻集人天之瑞福
恭惟皇帝陛下茂膺瑞命祇紹凝圖待旦垂裳冒洪禧
于海域彌旬舞羽偃師節于方陞順履佳辰夙標聖旦
旅貢琛而展慶粲鄰玉以伸歡某官襄贊大猷翊宣至
化欣誕彌之佳節集景貺于羣倫裒對梵仙宣揚秘典
光闡佛乘之最上迎天筭之遐復願皇帝湯德逾新堯
文增煥九河開奠五緯循躔綿周億載之期長奉萬年

之慶鋪昭惠命永庇含生某官伏願穆景三階凝和九
鼎並翊帝猷之亮交隆國棟之華然後願鳴玉翠蕤藹
藹贊清寧之運游童逸老熙熙樂仁聖之場

聖節滿散疏

國家寶祚綿長鴻基丕固惟正陽幾望之旦乃元后克
生之辰列辟投誠百靈薦祉延梵宮之開士集聖會之
良因上奉至慈永臻純嘏帝圖累盛益隆百順之祥睿
筭無疆共罄萬年之頌傾虔懇祝倍萬常均

天申節道場疏

嵩呼萬歲聲聞者三河出九疇嚮用曰五冀吾君之必
壽誠品彙之至情茂對圓穹式教淨供皇帝陛下伏願
授天增策弼我不基負黼宸而朝諸侯下江海以王百
谷家人上壽永瞻長樂之慈顏鄰國交歡無復甘泉之
屯騎

聖節開啟疏

汪彥章

炎帝執衡允協中興之運昊天申命誕開長發之祥罄

萬宇以傾心望九重而申祝矧叨禁從敢後封人皇帝
陛下伏願萬福來求五兵不用河如帶而山如礪盡復
漢疆天為蓋而地為輿永居宸極

天申節功德疏

劉夷叔

東方有佛昧者不知南面垂衣於此即是救百萬生靈
已迫之命豈一二筭數可知其功敢因休辰輒論聖筭
皇帝陛下伏願雲仍姬妣之國蟣蠓彭聃之年心廣體
胖豈待殷殷而至福天長地久自然蕩蕩以難名更推

六氣之和用集百嘉之慶

聖節道場疏

林豈塵

四月維夏千齡開災厯之祥一人出真萬國仰電樞之慶夙涓梵宇虔命緇流課竺土之秘文効華封之遠祝伏願皇帝陛下神功獨宰聖德日躋泰道方開早回鸞于西極夢齡永錫長比筭于南山

生辰

太皇太后生辰功德疏

王岐公

純乾紀月屬慶誕之嘉辰五竺繙文起真乘之上福敢
歸虔於淨教用助廣於勝緣太皇太后伏願萬壽天隆
百禩雲布陰功助化常扶邦祚之安徽德流音永播工
詩之首

皇太后生辰功德疏

金行肅氣適標載誕之期玉相分毫能現無方之化虔
敷梵席廣繹貝文庶憑最上之緣以續無疆之筭皇太
后伏願等法輪之固同慧日之升海藏潮音已集祇園

卷之十五
之果慈雲仙樂永居長樂之尊

皇太后生辰功德疏

愛日臨郊應帝衡之初序祥雲覆戶鍾母道于昌期預
祓禁楹具嚴實供終仰大慈之教當垂外護之仁

皇太后生辰功德疏

相慈之厚方致養以盡誠慧力之通皆應緣而起福紀
誕祥之嘉序開梵席于瑤堦大錫壽祺永歸覺利

皇太后生辰功德疏

長律首宮微陽施種爰啟玉衣之瑞有昭彤管之徽象
法供于龍華發妙音于猊坐庶導續齡之祉永貞同體
之符

皇太后生辰功德疏

坤德流徽式臨于誕日貝文宣妙共仰于比丘載嚴秘
邃之庭駢集清脩之侶冀資福壽時啟靈場伏願毫相
分光法雲假廕憑茲勝剎永保遐齡

皇太后生辰功德疏

塗山啟夏邦家必本于閨門封人祝堯臣子各伸其忠
孝敢因慶旦恭演琅函憑最上之妙因祈無疆之遐筭
皇太后陛下伏願降年有永如月之明承天而時行懋
著徽柔之德眉壽無有害永光熙洽之朝

五百家播芳大全文粹卷七十五